

2010-mi ilassutitut aningaasaliissutitut inatsisissatut siunnersuutip aappassaaneernissaanut akissuteqaat

(Aningaasaqarnermut Naalackersuisoq)

Akissuteqaat

(Aningaasaqarnermut Naalackersuisoq)

Aappassaaneerinninneq

2010-mi ilassutitut aningaasaliissutitut inatsisissatut siunnersuutip siullermeerneqareernerata kingorna Aningaasaqarnermut Ataatsimiititaliaq sulilluarsimanerani qujassuteqarfigaara. Aningaasaqarnermut Ataatsimiititaliap isumaliutissiisummini suliassa qarfinnut ataasiakkaannut tunngatillugit oqaaseqaatai massakkut oqaaseqarfigissavakka.

Missingersuutit pillugit Naalackersuisut Inatsisartunut Aningaasaqarnermut Ataatsimiititaliamullu ilisimatitsisarneranut tunngatillugu Aningaasaqarnermut Ataatsimiititaliap naatsorsuutigaa tamakku siunissamut isigisumik akuttunngitsumillu suliarineqartassasut. Naalackersuisut ukiumut marloriarluni missingersuutit pillugit ilisimatitsisarniarpoq – aprilip naanerani aammalu augustusip naanerani.

Ilulissani erngup nukinganik innaallagissiorfissamut akuersissummut tunngatillugu ilisimatitsissutigisinnaavara aallaqqaammut aningaasaliissutaasut C-missingiut aallaavigalugu aningaasaliissutigineqarmata, tamatumalu kingorna suliarinnittussarsiuussinermi isumaqatigiissutit aningaasartaat annikinnerulersimallutik. Suliassamut ukiunik agguataarisimaneranut tunngatillugu suliarinninnissamut isumaqatigiissutigineqartoq naapertorlugu aammalu sanaartugassamut tunngatillugu suliassat assigiinngitsut sanaartortumit qanoq pilertortigisumik naammassineqarsinnaaneri tunngavigalugit aningaasaliissutit atugassiissutigineqarput. Tamatuma kingorna ukiumut agguataarinerit Naalackersuisut isumaginarpaat, Naalackersuisullu utoqqatsissutigissavaat pilersaarummut aningaasaliissutit Aningaasaqarnermut Ataatsimiititaliap aalajangernermini inassutigisai naapertorlugit nuussorneqarsimanngimmata. Mianersornissarli eqqarsaatigalugu aammalu aningaasat pineqartut sanaartugassap tamakkiisup 1 procent-ianit minnerummata, Naalackersuisut pingaartut isigaat sanaartugassat naammassineqarsimatinnagit sanaartormilulu naatsorsuutiviit pissarsiarineqarsimatinnagit aningaasanik peersilluni nuussinissap pingitsoortinnissaa pingaaruteqarmat.

2010-miit 2013-imut ilinniartunut inissianut pilersarusiornissamut sanaartornissamullu atugassiinissamut tunngatillugu Aningaasaqarnermut Ataatsimiititaliaq ilinniartunut inissianut tunngatillugu immikkoortumut pilersaarummut tunngatillugu paasissutissanik ujartuivoq. Naalackersuisut oqaatigissavaat ukiumiit ukiumut pissutsit allanngorartarnerat pissutigalugu pisariaqartitsivinneq siumut oqaatigineqarsinnaaneq ajormat. Pilersarusiortarnerup eqaatsumik ingerlanneqartarnissaa pisariaqarpoq. Taamaattumik suliassa qarfik taanna eqqarsaatigalugu siunertaqarnerusumik iliuseqartarnissaaq siunnersuutigineqarpoq pisariaqartitsineq aallaavigalugu sanaartortitsisarnikkut.

Qaasuitsup Kommunianni qassutinik annaasimasaniq qalluinikkut saliisitsineranut tunngatillugu Aningaasaqarnermut Ataatsimiititaliap kissaatigaa aalisarnermut tunngatillugu politikkip ilusilersorneqarnera pillugu nassuiaanneqarnissartik. Naalackersuisut ilisimatitsissutigissavaat qassutinik annaasimasaniq qalluinissat ingerlanneqarnissaanut maleruagassiorneq aallartinneqareersoq qassutinillu annaaneqarsimasunik nalunaarsuineq suliarineqartoq.

Nanortalimmi atuartut inaannik pilersitsineranut aningaasanik nuussinermut tunngatillugu Naalackersuisunit oqaatigineqassaaq atuartut inaannut tunngatillugu nassuiaatissaaq piareersarneqarmat. Aningaasaqarnermut Ataatsimiititaliap kissaatigaa nalunaarussiaq sioqqullugu killiffik pillugu aprilip naanerani ilisimatinnegarnissartik. Atuarfiit atuartullu inaat pillugit sanaartormerut pisussaaffilersimaneq pillugu kommunit Naalackersuisullu majip naanerani oqaloqatigiinnissaat naatsorsuutigineqarpoq.

Taamatut oqaaseqarlutik Naalackersuisut 2010-mi ilassutitut aningaasaliissutitut inatsisissatut siunnersuut Inatsisartunut akuersaartumik suliarineqartussanngortippaat, pingajussaaneeraneqarnissaalu qilanaarilereerlugu.

